

四庫全書

史部

欽定四庫全書

史部
硃批諭旨卷一百七十四之十二

詳校官尚書臣德保

編修臣裴謙慶勛

總校官中書臣朱鈐

校對官助教臣胡予襄

謄錄舉人臣吳之承

欽定四庫全書

硃批諭旨卷一百七十四之十二

硃批李衛奏摺

雍正八年五月二十二日浙江總督管巡撫事在

任守制臣李衛謹

奏為奏明事竊有西洋人德瑪諾從前因在浙染病
具呈調治寬限回京咨部在案臣於上年十月內
回任後遵

旨行查催令起程據稱老病寒冬長途難行驗明咨報
內閣今於本年五月初間委官設法伴送至廣東
澳門安插去訖所有省城北門大街天主堂一座
現已閒空據地方官詳請撥役看守前來臣查西
洋人原係異域外教無知愚民多有貪伊厚利暗
地入其教中并及駐防旗下亦染此風甚有關係
臣前設法嚴禁始知歛跡曾經附摺

奏明此等深心結納意欲何為乘此未可再留根株

以杜日久後釁查勘規模制度與佛宮梵宇不相
符合伏思海洋之中惟

天后最顯靈應即外夷西洋各種之人無不敬畏

本朝屢奉

敕封褒崇凡近海之處俱有大廟商民往來祈福獨杭
州為省會重地控扼江海未有專祀現今寧邑已
奉

欽建海神廟附祀

天后臣愚以為似宜止作臣意將天主堂改為

天后宮字樣諸凡合式不用更造只須裝塑神像擇德行羽流供奉香火則祀典既清而異端亦得靖

其萌孽矣是否有當相應請

奉祀

甚屬合宜

旨欽遵再臣前次所奏江南匪類案內供情曾奉有

硃批摘其大畧另摺錄奏欽此及審出捏造識語妖言凡有關係者若摘出另奏則原疏情罪難以相符故不得不備載招內先經遵

旨具題其餘俚鄙浮誕之言似毋庸又行瑣瀆相應附
是

陳聲覆至臣今次摺內奉有

硃批不料李永陞亦是一負恩無恥之人奈何奈何欽
此臣捧讀之下不勝駭異如李永陞性桂史貽直
三人在浙相見時備述感激

皇上加恩深重之處每至墮淚涕零豈料李永陞又有
前情此用人之難以致

聖主多費天心於此可見而臣下之待屬員更當時時

事出情理之外真可謂奇
警惕以為炯戒也為此謹

奏

覽

同日又

奏為恭繳

御批遵

旨覆奏事竊臣於本年五月初四二十一日兩次接到
皇上批回原摺伏讀

御批仰見

聖心為萬民憂勞雨暘多少無不上厯

宸衷浙江三四月間雨水稍過別屬春收畧減無大妨礙現在上游早稻甚好將屆告登惟湖府之安吉州長興縣二處為天目諸山溪水匯歸之所由高處衝入低窪田內一時難消埧岸間有坍缺臣先委標員分頭細勘情形誠恐有誤插種之期隨於五月初旬動支藩庫

恩賞備公款項銀一千五百兩委員分往安吉長興二處督令車戽積水修築圩岸將實在無力買秧窮民酌量幫助購苗廣種設有不足再行給發去後隨據各員稟覆連日清明今春太湖淩港開通山水易消高田悉已播種低處亦皆插蒔民力尚是紓徐齎去銀兩購苗動用無多田埂圩岸亦有本主自修者統俟各員回日定數另行核實報銷外相應

奏明上慰

聖懷至

御批詢問劉章張文耀之處臣聞劉章年力既尚未衰
自可驅策浙省臬司事務原屬繁劇近今民風漸
覺丕變盜案頗少人命亦稀非比藩司若委用乏
人劉章尚堪任使其劉枏誠如

聖諭調於內用實為相宜至於鎮海營守備張文耀原
係陸路湖協守備臣因其長於水師是以

題請調補續於上年三月保舉一等今春送部引

見該員人果明白勤於哨巡辦事急公操守尚可其水
務亦在中等以上緣其本營叅將蘇福漢仗雖優
於水師不為高超故將張文耀暫留該營未即別
用今因定標遊擊員缺緊要擬以張文耀請補在
案茲蒙

聖明錄取仰見寸長不遺浙省水師人員好者甚少如
蒙

天恩准於浙屬叅遊中試用實可資臣臂指之助看其
再加歷練方可以膺大任倘閩廣現在緊要需人
自應移緩就急以副

皇上因地用才之至意再蒙

諭旨指示提督萬際瑞之處

聖訓周詳洞照朗澈萬際瑞亦將伊奏摺內所奉

硃批宣示到臣備述追悔改過之情而臣仰誦

天語更為惶悚愧感難安自當彼此勸勉俾之遵循

訓旨雖不敢望其即能振刷得宜但求與地方營伍相
安免致又費

聖心顧慮也伏思

皇上留意人才薄技微長蒐羅不棄固無待於臣下之
揄揚但竊見

聖主批示為封疆用人其難其慎若不仰體

天心將平昔所知之人指出短長據實陳明以備採擇
而惟圖一己之便留為幫助殊非以人事

君之義以臣所知如貴州地方雖屬緊要嚴疆然督臣鄂爾泰頗能調度此際提督止須嚴明有威望者即足彈壓尚易得人今現任貴州提臣楊天縱臣

素知其料理地方營伍捕盜事宜粗細皆能周到
近來頗露哀邁景況止堪邊徼地方資其彈壓
如年力現在未衰不但邊徼之才即江浙廣東繁

鉅亦可勝任黃巖鎮臣李燦不避嫌怨辦公過當
臣於上年在京時猶未敢遽保其可以獨任一面
今回任以來見其諸事實心整理調度有方比前

更加歷練寬嚴得宜可備南方水陸兼攝之用據
其呈詳欲於撤巡時懇請

陞見如蒙

俞允則其可否任使

好

聖明自有洞鑒至杭協副將吳進義人稍粗獷而明白

勤幹勇敢向前雖係北人畧曉水務於南省地方
事宜皆為熟悉嘉協副將王緒級初任時行為尚
有偏執未近人情今逐事開導甚能力加改革束

兵有法訓練盡心宜於北地此二員將來均可儲

是

為方鎮之選其他如平陽

粗俗習氣

陸路副將馮吉品其人

恐難脫換

畧覺粗率瑞安水師副將蔡添畧提標右營遊擊

魏國泰人材水務俱嫻而在任尚淺黃巖鎮標左

營遊擊張兆龍漢仗技藝兼優護乍浦遊擊柳進

忠熟悉各洋兩員哨巡水務俱好而操守尚須再

試溫鎮中營水師遊擊李舉湖協左營陸路守備

李壽演其人材均堪造就以上皆臣現在屬員中

可取之人再加操練數年均堪以膺大缺漸次任用者也尚有陞任浙江提標右營遊擊黃有才經臣附疏保舉旋蒙

特旨補授臺灣南路營叅將臣因海外要地是以不敢

題留但南路係屬陸師該員於江浙洋面情形最為所奏是其到任後諒閱督高其俾自必酌量相宜題請熟諳若於水師調用更為人地合宜又原任太湖調補也

營遊擊葉應龍今陞湖廣澧州營叅將其人雖操守難信而技藝頗精且熟於沿海陸路地方今任

湖廣亦恐未能展其所長又臣有表姪邵銓現任湖北岳州衛守備係由侍衛補放其弓馬臣久未看見而年力強壯膽勇非常人頗忠誠用之營伍亦足備勇將之材可否發與浙江俾得再加教導望其成人出自

聖恩又臣兼轄江南武職中如提標駐劄上海遊擊葛世雄辦事盡力人材均優右營守備徐潛蕭營守備高鈺平望營守備李紀皆漢仗弓馬可觀留心

地方營伍俱屬可用之才以上各員臣非敢濫行
保舉實因

聖主加意作人臣既有所知不敢隱默用是附摺陳明
伏惟

睿鑒所有二次奉到

硃批原摺理合一併恭繳謹

奏

覽各將備才力俱經洞悉已命照摺錄存徐徐斟酌有

旨

雍正八年六月初六日浙江總督管巡撫事在任

守制臣李衛謹

奏恭請

皇上聖安

朕安

醫者謝鵬到京大得其力朕甚嘉之

同日又

奏為遵

旨議覆事竊據定海鎮總兵官林君陞呈稱本職前差
把總齎摺進京恭請

聖安附有條奏一摺欽奉

硃批言之督臣李衛令其酌定可否具奏欽此相應鈔
錄原摺呈請查照奉

旨事理欽遵定議

奏覆施行等因到臣據此該臣看得林君陞奏稱凡

屬兩省交界之處宜照浙閩楓嶺南澳之例統屬
兩處地方聯絡管轄一條臣查兩省接壤之區宵
小易於影射潛藏而間有不肖文武藉詞推諉誠
不能免荷蒙

皇上聖明遠照洞悉弊端先後奉頒

諭旨將各省聯界不清者令地方官勘丈明白不得彼
此推諉又凡交界處所失事探實賊盜無分此疆
彼界即行密拏使從前關會稽遲隔屬掣肘之弊

得以剔除

睿鑒精詳無不仰頌至於各省地界犬牙相錯其邊疆
聯接之處每不止於一省即一省中亦不止於一
縣如浙屬杭嘉湖嚴衢溫處七府與福建江西江
南安徽聯界者共有二十州縣內如太湖巨浸淒
港錯雜最為藏姦之藪從前止設一營兩省共轄
今則江南添設叅將仍與浙省聯絡分防又烏鎮
為嘉湖蘇州三府七邑交接之所湖府捕盜同知

駐劄於此特設關防統屬江浙各縣督緝類皆因地制宜以為防範必如楓嶺之羣山雄踞有仙霞黎嶺之險南澳之大海汪洋扼詔安饒平之衝方議設營分防控制兩地其他接壤之處甚多若欲一例添設不勝其繁以臣愚見似應聽各督撫提鎮就兩省毗連要隘處所斟酌情形應否設立會商

奏請定奪未可驟論者也又林君陞奏稱沿邊陸汎

有偏處海濱之臺寨要口添設槳船得以進淺搜緝一條臣查沿海汛防原有水陸之分但戰船止能哨捕大洋若邊岸泥塗潮退膠淺每有巡船所不能到者而扁舟小艇易於乘潮往來姦民駕駛便利不但乘機竊刦且有偷運米穀夾帶私鹽等弊雖墩臺營堡沿路皆有陸兵看守稽查因未設巡船常至追捕不及且水汛即非所管更得藉以推諉臣稔知其弊凡沿海陸路如台屬之海門前

所家子三江口新亭章安道頭寺前橋溫屬之樂
清虹橋江口汎諸處盡皆添設小巡船健跳昌國
石浦又已改為水師俱經會同漕運督臣性桂觀
風整俗使臣蔡仕舩先後具

題已蒙

諭旨准行近又於紹屬之周家路臺等處議行添船現
委黃巖鎮李燦前往查勘又江南崇明縣各沙及
福山營增置快哨沙船之處亦與江蘇撫臣尹繼

善商定會

題各在案此外應如該鎮所請令各省督撫提鎮凡
陸路濱海之臺寨汛口淺塗及江河中流酌量緊
要處所添造槳船防範哨巡遇有姦匪往來即可
飛檣擒獲所需成造及修葺工料於各處備公銀
內動用仍將船隻造入營員交代冊內以垂經久
其於地方實有裨益又林君陞奏稱海汛暗礁外
來商艘不能悉知宜汛口刊立木板曉諭礁上建

豎石標俾免撞沉一條臣查海船觸礁多成齏粉
若使預知趨避誠足保全商漁但暗礁深入水底
海道茫無畔岸頭舵僅能畧記山向大槩看視水
面結花以為躲閃究難認定處所即刊立木板於
岸而礁在水中相離遙遠安得望見清楚況潮汐
起落蕩搖颶颳巨風震撼裝載石標之船亦恐到
礁即破未易建豎言之似易而行之實難應先令
該鎮暫動公糧所餘於伊汎地試行如能建豎有

效則發給備公銀兩推而行之實足以廣

皇仁而重民命矣以上各條臣知識粗淺未當機宜緣

奉

諭旨酌議謬抒所見陳履伏乞

聖明睿鑒指示施行謹

奏

發九卿會議具奏候旨遵行

同日又

奏為奏

聞事本年五月三十日據臣差往江南巡緝私鹽盜匪
弁員稟稱崇明縣花沙海梢等處民人忽率衆鳴
鑼到新開河市鎮強勒各鋪戶關閉店面喧鬧地
方等情隨據蘇松鎮總兵官施廷專呈同前由臣
一面嚴批查拏首犯解散餘黨一面密加察訪因
崇明佃民向例夏冬二季交納業主田租之外尚
有轎錢折飯家人雜費等項經知縣祖秉震於上

年具詳禁革立碑文內分晰未明刁民藉以為題
欲將夏季麥租不還先寫匿名謗紙黏貼指稱取
租富戶施大受與新任鎮臣施廷專聯宗倚勢勒
收等語聚衆多人逼迫店戶罷市甚至毆辱巡檢
雖經營縣掣有朱鎖等四五人到案尚有寫匿名
帖之夏君欽等棍脫逃未獲該縣欲為掩飾詳文
含糊未將實情叙明臣查崇明地居海外各沙孤
懸錯雜民情向稱刁悍今欲借端圖賴額內一季

正租輒敢黏貼匿名聚衆妄行惡風斷不可長現
在批行江蘇按察司蘇松太道嚴查確情會同營
員勒獲為首鼓衆要犯咨會江省督撫二臣聽其
究審定擬分別嚴處示儆外事關海疆要地棍徒
聚衆理合繕摺奏

聞伏乞

聖鑒謹

奏

崇明邊海要地刁風尤當禁遏所見是朕命卿將施廷
專調補浙省已有旨諭部矣黃巖總兵李燦於此缺宜
否倘以浙省鎮臣不便輒調江省一面委員暫署崇明
一面將情由聲明奏聞候朕裁酌

浙江總督管巡撫事在任守制臣李衛等謹
奏為請

旨遵行事竊照浙江乍浦海口通達各省外洋設立滿
營水師實於

國家兵制完備盡善現在閩省咨送弁員并浙江水師各營挑選熟悉水務綠旗兵丁四百名充捕盜舵工阿班斗旋繚手俱能加意教習實力奉行滿兵操練甚屬盡心臣等親見已有幾分諳曉前蒙皇恩賞給兵丁生息銀內乍浦水師共有一萬而

聖主先事籌畫

特頒恩諭乍浦水師新拔兵丁錢糧照天津例每月加出五錢各兵感戴歡呼益加踴躍緣前項綠旗兵

丁四百名雖屬水師同營而滿漢攸分前次生息銀兩未敢冒昧派入均沾隨將

恩賞加給餉銀應否一體支領之處移查天津都統准有覆文彼處舵工水手等人皆係雇募在營支領工食非係食糧兵丁不曾加增等語是以浙省現在亦仍照舊額支餉未敢一體添給但查此項兵丁俱係各標營抽調能悉水務之人身既遠離鄉井或挈家而來或分住兩地皆有養贍家口之需

且伊在本營尚有挑選拔補千把一途而乍浦滿營官員漢人不與挑選別無出身可圖惟恃錢糧過活其中如阿班等人善於大洋颶風猛浪之中扒上桅頂更非自幼練習不能精熟捕盜舵工亦非容易將來滿兵即於水務極嫻而若輩仍須留用駕駛是其勤勞艱難之情原有倍於別營水兵非可援以藉口者因此與將軍臣阿禮袞副都統臣富參密為商酌無異所有每月加給銀五錢之

處似應仰邀

皇上格外洪恩一體支領竝各兵紅白事故可否亦於
恩賞生息銀內量為分派臣等未敢擅專相應據實公
同

奏明懇請

諭旨方敢遵行為此謹

奏

所請甚屬允協候另有諭旨從部頒發

浙江總督管巡撫事在任守制臣李衛等謹

奏為請

旨調補事竊照杭州為省會重地旗民交處又有各府
州縣緝獲逃人解省皆須理事同知承審必得明
白勤幹之員方可辦理無誤今現任同知佟保初
做外官未諳政務審斷旗民關涉事件非太過即
有不及多未妥協止宜京員任用尚可供職查乍
浦理事同知鄂善隨伊父鄂密達在浙數年稍悉

旗漢民情土俗肯於向前但覺少年好勝不甚老練且與副都統富參性情不合今鄂密達已蒙

皇上調任江寧無須迴避若以鄂善改補杭州理事同知俾臣等再加就近訓飭於事務可免舛錯之虞其乍浦理事同知雖所轄地方無多而營制初設海口通衢閩廣商民雜沓更須歷練明白之人方可勝任仰求

皇上敕部揀選發補則一轉移間地方彼此有益矣緣

係調用旗員未敢冒昧題奏合先會同將軍臣阿
禮袞繕摺具

奏請

旨遵行伏候

睿裁謹

奏

已有旨諭部矣

諭浙江總督李衛知悉外邊傳有呂氏孤兒之說當密

加訪察根究倘或呂留良子孫有隱匿以致漏網者在
卿干係匪輕逆賊獲罪於天事出情理之外雖到尸不
足以蔽厥辜部文到日遵照施行勿留寸骨於人世毋
得苟簡辦理特諭

雍正八年七月二十五日浙江總督管巡撫事在

任守制臣李衛謹

奏為覆奏事竊臣欽奉

硃諭密旨將逆惡呂留良子孫察訪根究勿使隱匿漏

網并不令逆賊寸骨得留人世跪讀之下倍切警
惕查逆賊呂留良罪大惡極於雍正六年冬間奉
文查拏逆黨嚴賡臣等之時臣已將現在逆子呂
黃中呂毅中立逆之長孫呂懿歷三犯解京其律
應緣坐之逆孫呂懿本呂懿正等十七名并年未
及歲之呂懿林呂懿兼俱行查明監禁其逆犯曾
孫雖律不緣坐而罪惡滔天者之嫡屬未可以常
律論并將其年在十六以上之呂為雯等四名及

髻鬣襁褓之呂服先呂誦先等十五名亦行查出
分別監禁看守又有逆孫呂為景向隨父懿緒出
繼與逆姪呂仙中者今懿緒已故將為景并其初
生之子阿大查出入冊不使得因過繼倖漏各在
案迨臣上年進京

陞見時面奉

諭旨之後誠恐或有遺漏隨於京邸密封移咨署督撫
臣性桂蔡仕舛再加確查據稱俱經復查無遺分

別造冊送部又在案臣於上年十月初二回任路過嘉興查知逆犯呂留良墳在石門縣識村地方即飭選撥兵役協同地保常川看守委官巡查又復嚴加密察已故逆子呂葆中有一繼妻曹氏年六十八歲因從前剃髮為尼出家於南陽廟中未經入冊續又查出同現存已故各犯之娶過妻妾勞氏嚴氏等二十四人及未曾許字之女四人一并聽候部示其現在監禁各犯內有呂懿剛於本

年六月初一日病故當經委員驗明取具圖結報部今奉

密諭臣再加意留心嚴督地方官務須詳查確訪稍有絲毫疑情即行根究到底總之此案臣斷不敢邀譽沽名稍存姑息自當選派文武慎重辦理不致畧為疎忽得有漏網也理合先行

奏覆伏祈

聖鑒謹

奏

所奏是此案逆犯乃

君父

宗社之仇讐豈他悖惡之可比當更詳細搜索以淨根株

同日又

奏為奏明全省近日年景情形事竊查浙江田稻有
早中晚之不同上游金衢嚴等八府早者大槩居
半杭嘉湖三屬則晚稻為多今歲四五月間浙西

雖然雨多尚在未曾種植之先浙東地高不慮雨水惟恐天旱故寧紹金衢嚴處六府各縣早稻收成豐熟台溫二府所轄近海地方當六月初五日發有颶風維時早禾已經收刈十之五六晚禾尚未開花俱無妨礙惟台屬黃巖太平臨海寧海等縣傍岸近水塗田間被風潮損傷通縣不及十分之一二其中又復高下不齊此等低處最甚者風止後雨洗鹹潮尚有三四分收成新米價值近海

者每石僅七八錢不等杭嘉湖地方夏收豆麥畧減分數而蠶絲既熟沾利自多晚禾雖未可期必然現在雨暘時若一路菁葱遍野雨水盈疇車庖不勞民情安適臣所過之處目擊情景實有含哺鼓腹耕鑿自如之象而蘇松等屬秋苗亦盛將來發華結秀兩月之間如無大雨暴風收穫齊全豐登又已可望矣再查海寧海鹽兩縣雖因海中發颶潮水漫塘而石工幸皆保固惟土塘及舊時碎

石老塘間有被水衝擊坍卸者現已搶修填築以
禦秋汛安吉州長興二處五月間水退之後田禾
悉已補種具結不致成災惟黃巖等數縣內有近
海之民人房屋營汛墩臺等項間至被風刮倒不
無傷損當經酌動鹽務贏餘銀兩分別賑恤幫助
安頓俱不致有失所臣查浙省今歲仰邀

皇上福庇尚不至有滂溢過甚之虞而此番颶風太大
近海數邑民田廬舍間有損傷臣雖從不隱匿絲

毫災傷稍自粉飾而返躬思咎實切悚惶近又恭承

聖訓以恒雨之徵惟狂始見荷蒙

恩諭浙江多士凜盛滿之戒深敬畏之心仰見

聖主容保教思至意豈惟浙士感戴欽承臣亦倍加凜惕惟有痛自刻勵不敢畧逾尺寸以期稍免隕越於萬一伏祈

睿慈鑒宥謹

奏

今歲直隸以至各省皆有微災然此咎徵殊與卿等無涉俟秋成後奏報到齊朕自另有諭旨通頒

同日又

奏為奏

聞事竊照浙江學政顧仔於本年二月到任後即赴處州台州補行科考二郡俱係山海僻壤生童數少雖有怨聲尚未聞其弊竇五月間至紹興府首行

歲考臣留心稽察有學政書吏姚三聚皂頭周姓
囑各學教官凡招覆新進童生每名索規禮七錢
告假遊學生員每名索銀一錢二分各學投冊索
銀四兩山陰會稽因附郭倍之學書門斗偶因文
冊些須舛誤必加重責聲名已是平常及生童發
案後外論更覺譁然街衢遍黏匿名揭帖開有舊
時遊學勒銀一兩新告遊學勒銀一兩四等免責
勒銀八兩生員保等勒銀二十四兩新進文童得

銀二百四十兩武童得銀八十兩等項六條指新
進文章鈕昊武童黃尚義為據該府顧濟美查拏
黏貼之人已無蹤影學政顧仔聞知即發鈕昊原
卷諭查有無撞騙鈕昊堅不承認第書吏皂頭出
入傳話肆行無忌勒索遊學生員否則提比鬥
等事與揭內相同又有門子李榮全面語各學將
來考試教官另設下等恐嚇撞騙已經革退而皂
頭周姓前索繳招覆新生規禮已收者忽於六月

初五日盡行發還并聞另有看文字徑實串同伊
子朦蔽作弊雖該府查拏無蹤匿名未足為據而
關防不嚴已見確實今該學政將匿名自行鈔送
移咨到臣自當再行廉訪并於臣回署之日吊取
指名之文武二生細加考驗學問騎射果否有弊
自必不能掩飾實則具疏叅究外事關學政優劣
臣既有所聞不敢隱匿理合先行據實附陳伏祈

聖鑒謹

奏

察訪的確然後糾叅此見是

同日又

奏為奏明請

旨事竊臣前因奉

旨特建

海神廟工程繁鉅請以原任直隸布政使張迺原任
萊州府知府王坦發浙監督效力具

奏荷蒙

俞允欽遵續據張适王坦先後到工承辦一切事宜俱
各實心盡力畧有頭緒詎意王坦於六月二十三
日忽發失血之證至今大吐不止日覺沉重即使
調理幸痊亦恐不能耐勞辦事據布政使張元懷
委官驗明出結具詳請令該員回籍調治如能痊
愈再行赴浙效力等情前來相應

奏明一面給咨回籍至廟工事務殷繁張适一人之

精神難以分身照顧兼理查有原任廣東廉州府知府蔣杲由戶部山西司郎中本部保送引

見奉

旨記名選授府職到任二載因署別府任內失入命案部議革職永不叙用現在蘇州原籍查蔣杲前與臣同任司官時知其為人謹慎小心而且殷實饒裕經手錢糧工程諒必顧惜身家不敢苟且草率況其獲罪在於據縣審招轉詳非係有心故入情

尚可原可否仰邀

聖主格外天恩准令赴浙協同監督廟工效力贖罪臣
未敢擅便理合繕摺請

旨伏乞

睿鑒指示欽遵謹

奏

照所請行該部知道

同日又

奏為恭繳

硃批遵

旨據實覆奏事竊臣接到前次具

奏崇明縣海沙地棍聚衆打鬧摺內欽奉

硃批崇明邊海要地刁風尤當禁遏所見是朕命卿將

施廷專調補浙省已有旨諭部矣黃巖鎮總兵李燦

於此缺宜否倘以浙省鎮臣不便輒調江省一面委

員暫署崇明一面將情由聲明奏聞候朕裁酌欽此

因部文未到正在祇候間於二十一日接准兵部
咨文始知欽奉

上諭業將嘉協副將王緒級陞授太原總兵官其崇明
為江南濱海重地著臣於浙江總兵內擇其才克
勝任者調補將施廷專就近管束教導臣跪誦前
後兩次

旨意欽遵查得浙省四鎮定海黃巖溫州兼轄水陸洋
面均為要區閩人雜沓非施廷專少年未諳所宜

惟處州轄屬稍僻事務亦簡雖堪調補然離省甚遠既於就近管束教導之

諭旨不能克副且處州鎮臣方文登勤苦小心於本任才具適為相稱實未足當崇明重寄若欲調補惟有李燦一人但黃巖洋面避風島畧難得又當浙省之中衝為商漁之聚數汎地四通八達素日盜案較定溫為多海門等口最關緊要歷任不得其人目前方見整頓且現在台屬鹽務皆委鎮府督

同辦理苟非熟練未能相安施廷專初到生疎自
難妥協但今崇明現在缺員要地難以久稽似應
遵照摺內

御批先行遴員委署候

旨遵行查杭協副將吳進義由江南提標弁員出身歷
任相近此地於蘇松營伍機宜頗為諳曉李燦雖
才情歷練尚有急於見好勇往太過之處而該員
又覺老辣若上司駕馭得法與海疆要地尚屬相

宜且前曾署理黃巖鎮務亦非生手現在遵即暫
令該員署理崇明俟李燦進京

陛見

皇上再加欽定抑或即將李燦調補崇明以吳進義仍
署黃巖均可不至有誤其施廷專由浙赴任時臣
曾見過人亦畧有才情可否以總兵之銜管理嘉
興副將事務亦係通衢繁地更兼去省咫尺臣可
遵

旨就近管束教導看其後改奮勉再為

奏請別用庶足仰體

皇上造就勲裔之德意矣惟是總兵為封疆大僚奉

旨命臣選調已覺難安若就臣下臆見遽行具

題改調副將專擅之咎何以自逭用敢先將實情遵

旨奏明俟施廷專到浙之日臣當遵照以李燦調補崇

明竝將施廷專原銜借管嘉興副將吳進義委署

黃巖之處

題請仰懇

聖明鑒察摺內情由若有可採或令李燦進京

陞見再定吳進義可否於崇明暫試如果堪以勝任再
行酌用則於人材地方均獲得宜之益矣至杭協
為省城極衝臣標中軍亦全省領袖兼有江南節
制營務督捕等事委任實難如部內有人懇祈

簡賞一員倘此際難得容臣再加慎選另行請

旨合并聲明所有奉到

硃批原摺理合一併恭繳伏祈

睿鑒謹

奏

已另有諭旨矣

浙江總督兼管江蘇督捕事務在任守制臣李衛
吏部左侍郎署兩江總督臣史貽直謹

奏為覆奏會勘松江海塘情形仰祈

睿鑒事竊照松郡塘工荷蒙

皇仁不惜數十萬帑金悉令易土為石億兆生民永得
保護安全此誠

聖澤汪洋亘古未有者也自上年開工已及一載臣李
衛先因進京往返給假回籍復任以來刻無寧晷
未得親往履勘今值秋汛之時與臣史貽直會訂
日期俱至蘇州正欲公同江蘇撫臣尹繼善前往
查勘適值黃運兩河水長各工緊要公議尹繼善
應移緩就急赴淮料理臣等於七月十六日親至

工所逐加履勘東灣起至花家角接續舊工先築塘一千八百七十五丈分為十五號內已築完十五層全成塘二百五十餘丈十四層以下至六層塘四百餘丈其餘鋪砌底腳築至五六層各不等勘其石料工程堅固結實如法砌築較從前迥不相同皆由總理通政司額外參議俞兆岳身任勤勞竭心盡力先築樣塘六十丈以為程式是以在工各員俱不敢苟簡草率悉皆照式修築惟是臣

等識見淺近所有勘過松郡塘工一切應行斟酌
通融添築各事宜未必有當謹另繕清摺逐一分

晰恭呈

睿覽是否可行伏乞

聖明指示庶便會同撫臣尹繼善核疏具

題請

旨欽遵為此謹

奏

詳覽會勘海塘情形及酌議添築石土工段各事宜俱屬協當朕深為嘉悅

浙江總督兼管江蘇督捕事務在任守制臣李衛吏部左侍郎署兩江總督臣史貽直蘇州巡撫臣尹繼善謹

奏為遵

旨會議具奏恭請

聖訓欽遵事竊臣李衛上年因蘇州踰布坊匠樂爾集

等聚衆結盟為匪一案先經

奏明請於擬罪發落後將其餘諸人作何設官彈壓
立法稽查之處會同江蘇撫臣尹繼善酌量條議
等因欽奉

硃批所論雖當俟此案完結後徐徐設法安頓妥貼方
是不可以其難處而因循置之至時應作何料理奏
聞請旨然後措施欽此今臣李衛於本年七月初一
日自浙起程至蘇與臣尹繼善正在會商適臣史

貽直亦因查勘松江海塘到來臣等公同酌議蘇
郡五方雜處百貨聚匯為商賈通販要津其中各
省青藍布足俱於此地兌買染色之後必用大石
脚踹研光即有一種之人名曰包頭置備菱角樣
式巨石木滾家伙房屋招集踹匠居住墊發柴米
銀錢向客店領布發碾每疋工價銀一分一釐三
毫皆係各匠所得按名逐月給包頭銀三錢六分
以償房租家伙之費習此匠業者非精壯而強有

力不能皆江南江北各縣之人遞相傳授牽引而
來率多單身烏合不守本分之輩因其聚衆勢合
姦良不一雍正元年有踞匠樂晉公徐樂也糾集
拜把商謀約會欲於五月五日放火劫庫如遇官
出救護即乘便為害勢敗則奪船下海被包頭吳
景範知風出首拏獲夥犯三十五人其為首之樂
晉公徐樂也在逃至今未獲彼時地方官止將十
三人處死給賞吳景範銀二十兩結案以此各匠

中之狡猾者肆行無忌如上年樂爾集之踵而效尤幸即敗露早得芟除此外竊刦之案多有若輩在內從前各坊不過七八千人近因大盜奚貴卿被獲其夥黨小匪散逸多於此中藏身現在細查蘇州閭門外一帶充包頭者共有三百四十餘人設立踹坊四百五十餘處每坊容匠各數十人不等查其踹石已有一萬九百餘塊人數稱是實為藏姦納污之藪雖其中亦有食力貧民而桀驁不

馴者頗多從而煽誘保無一時搖惑附和生事之虞臣等悉心會議民業不可禁絕姦匪務宜稽察誠如

聖訓當徐徐設法安頓妥貼方是不可以其難處而因循置之今不但踴匠一宗如蘇郡城外煙火百萬戶除楓橋千總竝無別員彈壓汎兵無多甚屬寥廓可慮謹就愚昧管見并蘇城營制事宜酌議規條以杜姦匪之橫肆一彈壓宜有專員也一營制

稍當酌改也一關汛更宜嚴巡也一稽察宜立成
規也一姦良宜先分別也一積弊宜行禁杜也一
需索宜行革除也一包頭宜并清查也一松郡法
宜畫一也此係臣等就事區畫因地設防末議第
恐未合機宜謹另摺逐條分晰遵

旨先行具奏是否有當伏乞

皇上俯賜訓諭方敢欽遵具

題辦理為此謹

奏

所議是照此具疏題奏可也

雍正八年八月二十日浙江總督管巡撫事在任

守制臣李衛謹

奏為奏請

聖鑒事竊照浙江布政使張元懷於八月十七日在任

接聞原籍報到伊親母章氏訃音據詳丁憂經臣

另疏

題報在案查浙省藩司事務繁鉅吏役巧詐最難得人荷蒙

皇上慎重揀選簡用張元懷來浙任事甫及兩月看其才識明白居官勇往雖志大心高尚欠老練穩妥然一切事務俱能立意要好若再加學習一二年間即南方大省巡撫之任亦堪寄託今綜核漸有頭緒遽爾離任實為可惜但藩司係旬宣大吏非臣所敢擅請可否仰邀

皇上天恩

特頒諭旨俯准張元懷給假三四月仍令回浙任事俾臣得以協力共襄公務不惟於地方有裨又可操練一理繁治劇之員以仰副

聖主愛才若渴之盛心現在浙省署臬司劉章新到鹽道王鈞為人忠厚二員於本任之事已多難以兼顧糧道朱倫瀚雖有徵收漕務之繁年內尚不押運過淮是以臣暫委代辦一面即令張元懷星速

起程庶免來回遲誤合併聲明伏祈

睿鑒施行謹

奏

所請是候另旨諭部給假

雍正八年九月初六日浙江總督管巡撫事在任

守制臣李衛謹

奏恭請

皇上聖安

朕躬已全愈矣俾卿知而慶喜謝鵬醫學通達甚有可取其年力精神雖非御前供奉之才然醫治宮廷內外儘堪奏效於初到時備述卿遣伊來京之由朕聽聞之餘不禁為之動心歛容今暫命南旋令其了畢家務即詣浙將卿餘證調理痊可必俟平復如舊然後具摺請旨送伊北來特諭

同日又

奏為覆奏事竊照浙江學政顧仔到浙以來聲名不

好歲考紹興府發案後街衢遍貼匿名揭單開指
該學政新進文武童生得銀等款雖未可遽信因
有關學校經臣具摺

奏明弔取所指有名之人考驗學問騎射果有實弊
再為具疏題叅臣於江南回署之後密行紹興府
將新進文章鈕昊武童黃尚義押送到省考試文
章弓馬兩次覆試俱屬將就去得經臣細訪雖係
年少傲倖入彀尚無受賄夤緣情事是以未行叅

劾但浙江大省士習初轉全賴學政維持風教整飭振興今顧仔雖無賄賣營私之處然關防不嚴縱子招搖且不能約束衙役致有索取進學生員小費如此舉動行事實為難膺斯任臣謹據實覆奏恭候

聖明乾斷謹

奏

顧仔不宜斯任所奏是已有旨矣

同日又

奏為奏明養廉歸補遠年庫項已清仰懇

聖恩鑒照事竊查浙省

恩賞各官養廉銀兩一案原議督撫兩衙門除養贍家
口本身用度延幕辦事外尚有各項公務之需每
處約得銀一萬兩內因總督向係兼管福建臣蒙
天恩特授浙江不為定例是以議給一半臣祇領此五
千兩以為用度將兼理鹽政衙門前任

奏明舊存管引承差規例養廉銀四千八百兩添補
湊用其議給巡撫衙門之一萬兩留存司庫因舊
有無著虧空向係耗羨彌補今已提取故將前項
抵完後任仍為養廉支用等因列單

奏明荷蒙

聖鑒恩准著令咨部在案今浙省從前題明未完無著
虧空銀兩已將存留臣巡撫衙門養廉銀雍正六
七兩年分共二萬兩八年分二千五百兩以之添

補悉經全數清完咨報刑部外相應

奏明至臣每年所領之數一切本身用度俱在於此
從前將原籍所收租糧間或通融添補尚可不至
匱乏自上年進京即將所有養廉分為署總督鹽
政二臣性桂等之用及給假回籍往來數月全未
支取其去年一切公私費用數實浩繁何為乃爾因將地土
若至如此艱苦則為不知朕心違負朕之體恤矣
典當并向本族稱貸百計那湊尚有不足猶自支
撐奈上秋今歲臣鄉被水無收未能接濟此外辦

理公事雖舊有

奏報掣規一項原無定數約計二三千兩存貯於外
僅供江浙差巡賞賚官弁盤費以及各項之需可
以無誤而本身日用延幕等件實在更為艱難故
敢冒昧於

聖主之前瀝陳實情查巡撫衙門養廉之銀議抵庫項
應支領者此奏朕甚嘉之將前所典當稱貸之項一
償補者現在已經歸清可否准臣暫為支領俟畧可撐
持之曰再歸司庫何至誤公朕意即前項清楚後亦
仍行辦公酌用出自

可不必歸庫留為添助薪水不敷俾用度從容顧不美
皇上天恩非臣所敢希冀也為此具摺
歎誰無耳目卿之操守廉隅豈猶不足以厭衆論耶遵
奏懇伏乞
旨行毋違
睿鑒施行謹

奏

覽

雍正八年十月二十日浙江總督管巡撫事在任

守制臣李衛謹

奏為恭報浙屬通省豐收歲登大有事竊照全浙今

歲早禾收成頗好經臣歷次分晰

奏報因天時未能預料不敢以十分期必遽為滿足
之言茲當秋成既熟萬寶告登各屬晚稻於九月
中秀實之際間日時雨滋潤長養穀粒飽綻續後
連日晴明天氣和暖刈穫登場每穗所得米數多
於往年即溫台海邊些須塗田收成轉移亦有七
八分者計畝無多合之通省晚禾實為有十分豐
稔此時陽春應候播種之豆麥生意萌動土膏滋

培米薪蔬菜雜糧食物價值無不平減民間各有
歡欣鼓舞氣象急公完糧爭先輸納通屬七十七
州縣中地丁錢糧八九月內全數通完者已有平
湖嘉善等一十六縣其餘尚有路遠未及報到者
歲前通完必多更逢久晴鹽場土滷廣出前奏上
掣產鹽畧少除正額外約多引目八萬今已共有
十萬之數目前下掣更勝現在各項存貯竝鹽義
倉米穀連年節次積儲上屆歲底盤查共已存有

一百四十餘萬雖每年出陳易新但為數既多南方潮濕恐難久貯臣更不敢以既有儲蓄歲復豐收遂忘預備為長遠之計業經遵照原案

諭旨仍酌動本款補漕銀三十萬餘兩分派各縣過半就於本地乘價賤時買補收貯并委員前赴外省成熟之處分頭購買於省城永濟倉酌量存貯俟買回新到米穀於來春將相近水次地方之久頓在倉者推廣

皇仁愛民盛心可否運往淮宿一帶分發今歲被水各州縣令差員押送到彼會同該處有司等官量減平糶接濟民食將原價帶回存庫來秋採實豐登之所買運還倉一轉移間不過畧費人力兩省均屬大有裨益如果可行容臣將彼此價值遠近運脚逐一查明分晰定議出入相當不致多虧再為題報始敢辦理陸續撥發合先附陳請

旨伏乞

皇上睿鑒批示欽遵謹

奏

此舉有益允屬應行詳查妥議具疏題請

同日又

奏為恭繳

御批事本年十月十五日臣前差把總齎捧

皇上發回原奏摺匣到杭臣跪領敬啓伏讀

硃批諭旨欽蒙

天恩宣示

聖躬萬安中心歡忭額手加慶又沐

溫綸垂問臣身跪誦之下感深刻骨竊念微末之軀無
關重輕先荷

皇上以臣尚有餘恙將醫生謝鵬

命回於十月初四日到杭當據傳示雍正八年八月十
九日面奉

聖諭臣望

闕叩謝益深惶悚自顧何人上煩

宸衷眷念至於如此雖竭蹶致身全家報效亦不足仰

酬

高厚於萬一謹遵

旨令謝鵬診視調治現在浮游之火漸得清理而本證

一時尚未能盡除日逐照常辦事未敢怠忽更當

仰體

聖心加意節慎以報

天恩所有奉到

批回原摺理合恭繳又謝鵬遵

旨回奏一件附摺進

呈如或但有可供差遣之處

諭旨一到即令赴京聽用為此謹

奏

謝鵬此際都中竝無急用處務俾將卿調治霍然全愈
具摺陳明得旨後方令起程至於辦理事務須量力而

為不可強費精神事過勿留虛靜調適如案牘繁雜堪
委屬員代勞者何必逐件躬親竭蹶耶若不欽遵朕旨
節慎愛養則違迂莫甚於此必依訓諭一一循行方為
仰體君心克報知遇也

雍正八年十月二十八日浙江總督管巡撫事在

任守制臣李衛謹

奏為遵

旨覆奏事雍正八年十月二十七日准兵部火票遞到

大學士公馬爾賽等寄字內開雍正八年十月十二日奉

上諭今因固原提督員缺一時不得勝任之人意欲令
宗明總兵官李燦前往署理其宗明總兵印務著吳
進義署理黃巖總兵印務著瑞安協副將黃有才署
理爾等可作字詢問總督李衛若李燦能勝固原提
督之任著李衛傳旨即令李燦來京陛見竝令吳進
義黃有才各赴委署之任其副將以下等缺即著李

衛遞行委署若李燦不能勝固原提督之任著李衛
速行回奏欽此遵

旨寄信前來等因到臣臣欽遵查得新調崇明鎮臣李
燦人頗明白遇事向前凡整頓營伍訓練兵丁俱
能不辭勞怨惟該鎮自入仕途歷任皆在浙省沿
海之缺陞轉雖藉隸山東而陝甘省分聞其未曾
到過若辦理彼處事務諒不致有貽誤誠恐於地
利形勢營制兵情諸務難得一時熟悉固原邊疆

重鎮員缺最關緊要非係平常可以試看地方臣不敢冒昧信其即能從容勝任查該鎮據報於十月十六日領到部劄十八日自黃巖起程順看西洞裏市沿海一帶地方不日來省赴崇任事之後即欲請

旨陞見但現在崇明有吳進義署理尚屬相宜臣謹遵聖諭隨差人迎去飛催李燦到日即傳

旨令其星馳兼程進京計期二十餘日可到恭候

皇上聖鑒察看其人才具能否稱職

是欽定施行再臣細思

皇上任用大員其難其慎之盛心稍有所見何敢不並
列附陳如福建陸路提督石雲倬人雖不無冒戇
而果敢向前曾於西邊行走帶兵出口自必熟諳
情形今在閩海蠻野之區未見其長泉州重地如
能得人石雲倬與北方相宜又大同總兵馮允中
生長西北在外多年為人謹細辦事勤慎臣不知

此二員已曾與廷臣商及俱屬不可動移者其近日有無過愆抑或原係緊要地方難於更調

聖明自必洞鑒臣復查得新調江南提督王紹緒於前任浙江太湖營遊擊湖協副將時俱曾為臣之屬

員知其人器量褊小調度平常恐舊習未除到來
俟伊到任後再看難勝上下兩江鉅任浙江提督萬際瑞近日收歛

改革而材具平庸僅能備員無他裨益可否將李
燦暫老其才以備將來兩處設有缺出之用臣可
保其於江海刁健地方尚能整頓有為不致措置

失宜有負職守也至瑞安副將黃有才係從臺灣
陞補過海守風路程遙遠到任尚未有期黃巖要
地該員驟膺大任雖一時未能放心但於浙省洋
面營伍原係熟諳臣現在斟酌委員暫行護理鎮
務一面飛催黃有才星速赴浙到後即令署理仍
當加意稽察教導辦理不致有誤為此具摺

奏覆伏乞

皇上睿鑒謹

奏

覽

雍正八年十一月十五日浙江總督管巡撫事在
任守制臣李衛謹

奏為遵

旨奏聞事竊臣欽奉

特旨命臣將福建福寧鎮總兵官員缺於江浙二省副
將中揀選一員奏

聞令往署理其副將等官亦令遞相委署奉

命之下敢不盡心揀選以期仰副

聖明委信之重緣浙屬副將除已蒙

皇上擢用之數員而外現在杭州象山瑞安三協尚係

缺官未到嘉興係總兵官施廷專管理湖協范宗

堯為人狂妄恐其專恣無忌紹協宋燮初到辦事

已見平常台協顧弘亮雖居官小心嫌於軟弱才

具亦短金協烏麗珠人頗勇敢但覺仍帶粗率尚

須大加歷練將來可以任用嚴協劉朝隆人甚老實而目不識字且不服南方水土時常多病僅堪北地將領之職樂清協王璉雖久於營伍頗覺老練而才具祇屬中等難膺重地大缺衢協周騰鳳人尚明白舉動謹細經臣

題請調補杭協兼管督標中軍試用尚恐人過和平未能必其即可勝繁劇之任何敢遽以要鎮請試其下江各副將中除鎮江軍標之楊寅現在被叅

江寧協未報到任京口水師蔡勇又係閩籍長於
水務非陸路此缺所宜兩江督標中軍王英辦事
庸鈍甚屬糊塗漕標中軍馬義才具稍粗措施平
常河標中軍許大學漢仗弓馬俱好而識見淺窄
辦事疎畧止可再加習練徐圖後用以上兩省各
員臣逐一斟酌較量再三思維此中浙江平陽副
將馮吉品人頗正氣雖畧覺粗直久歷京營巡捕
將備誠實小心比之諸員歷練稍深尚可放心已

經另為具

題請

旨暫署試用竝將副將以下遞相委署者一併附疏聲
明但本內若將各副將逐名叙出指摘其短長則
伊等俱係大員恐難彈壓地方且內中尚有堪用
者自應留其餘地以策勵其黽勉之心伏思

皇上慎重用人凡副叅等第考語俱令各督提密咨兵
部臣敢不仰體

聖懷具摺

奏明以備

皇上鑒定酌取為此謹

奏

所奏是當之至馮吉品惟一俗字不除耳此外俱堪將就具題到日有旨

雍正八年十二月初四日浙江總督管巡撫事在

任守制臣李衛謹

奏為恭陳勘過海塘近日沙漲穩固情形上慰

聖懷事竊照浙省寧邑海塘潮汐靡常屢屢

宸衷頻年修築時頒

諭旨令臣民務竭誠敬以期感格

特發內帑十萬兩創建

海神廟宇祈福祐民萬姓歡呼無不感戴祇緣從前
南岸日漲上年又有中流沙埂橫踞阻塞以致潮
頭東進尖山直趨北岸晝夜兩次搜嚙塘根坍塌

接踵臣回任以來因地制宜悉心籌畫加築盤頭
以遏水勢搶修險工以固塘身添砌大石坦水增
培後護幫堤設官安汛不留餘力更復博採輿論
重修鎮海塔鑄造鐵犀牛以待五行生尅之理本
年春夏雨水畧多潮汛雖仍洶湧江流勢若建瓴
臣親往致祭虔禱祈求嚴督工員竭力保固仰叨
皇上福庇夏杪秋初鹹水上滾淡水東注已將蜀山南
岸漲沙逐漸洗去入冬以來潮勢更覺變遷近則

中流沙埂每聞坍卸聲若雷鳴潮從東南向西海面較寬不致直侵北岸工程俱得安穩據各工員紛紛具報臣於十一月二十七日又赴塘工答謝神貺并勸查廟工目擊縣東三里橋至念里亭止約程二十里中間漲有底沙其貼近塘脚潮退小汛竟能顯露縣西新倉起過東約程四十餘里新沙漲濶高阜之處潮退可見約濶四五里不等惟尚存貼塘水道自北至南寬有三四里潮退止深一

二尺可於水中行至新沙之上逐漸見長目前已
有一半貼護塘根若再漲阜過東則所築全塘百
里堤岸直抵尖山更得永固矣其廟宇工程基址
俱已築平圍牆門面樓房業皆建立止須湖廣之
木并白石大柱一經運到則正殿新春即可上樑
目下正值天氣晴和不但工程可以趲辦而民間
磬米輸糧貿易趁食之輩俱得及時力作臣前摺
所陳丁地錢糧全數通完十六縣之外今已報到

共有三十一縣此誠

皇上至治翔洽是以熙皞成風也理合附摺陳明仰慰
聖懷謹

奏

海塘工程穩固情形以手加額覽焉

同日又

奏為恭繳

御批叩謝

聖諭事本年十一月二十五日臣跪領

皇上批回原摺一匣於繳

批摺內荷蒙

恩諭命臣加意調理指導量力辦事過而勿留委曲周
摯無微不至叩誦之下鏤心刻骨感戴難名自顧
才力粗疎而所兼荷者皆係

皇上封疆重寄倘有一事未經親歷誠恐錯誤難安是
以晝夜竭蹶不遑乃蒙

聖恩體恤訓誨至於如此今交冬至以後畧覺漸好敢
不遵

旨節慎愛養一一循行以期稍報

高厚於萬一也至倉穀轉運一事欽奉

恩批此舉有益允屬應行詳查妥議具疏題請欽此近
據領帑赴買各員已有報到購就運回請咨驗放
過關者將來雖難必其儘數買足穀石而米稻兼
收或可多得臣現在一面遵

旨先行具題一面飭行司道將舊日各案存倉之項酌量附近水次之處分派數目預行備辦船隻選擇委員於來春陸續撥運視江北山東接界黃運兩岸可通舟楫食米地方押往會同有司轉輸平糶至於今歲偶被水災州縣衛所業蒙

皇上大沛殊恩蠲免錢糧并及例不竝蠲之漕米亦行分別豁免緩徵且又給發帑銀動支倉穀分差大臣蠲賑竝施於兩月之外更加一月而大小口之

米數多增至半

聖澤皇仁周徧深厚至矣極矣惟是地方廣濶人戶殷繁饑民入冊難免無遺漏之虞現在鄉村僻野頗有乘機誘衆口稱借食扒搶雜糧者紛紛據報成案不一而足在首先起意棍徒實為可惡而無知被誘一時隨行實繁有徒且多係本地莊民聚置大辟不可勝誅若稍為從寬既恐惡風漸長聚衆為害又慮州縣借以諱盜縱惡養姦大有千係臣

與江南漕河督撫提諸臣公同密咨商酌先派文
武彈壓加意巡查嚴禁防範有犯即行勒拏確審
除刦財傷人各照盜搶本律外其餘素不為匪偶
因饑餓所迫止曾隨同扒糧者酌量情罪輕重分
是

別首從即時嚴加發落將已甚者杖斃一二以示
創懲但淮北山東交界處所連歲微覺薄收夏秋
被水今冬已賴

皇恩賑給開春青黃未接之時不無乏食窮黎更覺艱

難尚須設法安頓乃聞被災臨近接壤地方有麥
秋兩季合縣統算僅能三四分年景其中亦有高
下苦樂之不同竟作七八分收成匿報者又兼各
官迎合上司駁詰刪減饑民戶口太甚間有密諭
文武屬員凡遇外來就食之人槩行驅逐而被災
本處誠恐敗露前情更將漏報饑民攔截不許他
往雖據紛紛傳說未必盡實且救荒之道自古原
無善策但立法未妥以致饑民無處投奔或至激

生事端不可不為之慮緣關地方近日情形不敢
畏嫌隱諱冒昧直陳伏候

聖明鑒照再加訪查

乾斷施行所有奉到

批回原摺理合恭繳為此謹

奏

此奏朕深為嘉與但地方一遇荒歉散賑之際種種浮
議在所不免而東省民情又復愚魯不尚廉恥未便明

降諭旨滋長刁風致令州縣有司難以辦理亦惟有多
運米穀遴選可信大臣命往監查協辦并密諭該督撫
秉公詳審糶賑兼施以救濟之此外實別無善策敬候
上天慈佑來年氣候潛轉歲事更新民生復業時則地方
大吏以及牧令各員某優某劣孰貪孰良皂白自分妍
媸亦難掩也

硃批諭旨卷一百七十四之十二